

## KERWEREDD 2004



Isch griess eisch all er liewe Leid,  
 egal wu eer a herkumme seid.  
 Ob Kinner, Moann oder Fraa  
 und die buggelisch Verwoandschaft gries isch aa.

Oanner hot gsoad,  
 der woar ewwer nett vunn unserm Ort,  
 Verwoandschaft wär wie die Radde,  
 woas se nett fresse schlaafe se fort.

(Waonn isch denn verwisch, wu des gsoad).

Mäj wie hunnert Johr schon,  
 häwwe mer die Brennesselkerwetradition.  
 Drumm bedeit fer uns, woann isch eisch soach,  
 unser Kerb is mäj, wie de Hepprummer Hessedoach.

Zunegschd foang isch mimm Oufoang ou,  
 als erschdes kimmt unser Kerwekönischinn drou.  
 Iss des nett e wahrie Pracht,  
 wie se strahlt unn lacht,  
 wie e scheenie Rouseblieht,  
 es iss es Enkelsche vumm Gottfried.  
 Es is die Linda Flath,  
 e schee Mädsche in de Tat.  
 Genau sou schee, guckt na mol hie,  
 die Prinzessin Carina und Stefanie.  
 Der erschde Kerweborsch zum drittemool oagaschiert, wie immer clever, cool  
 und couraschiert.  
 Immer lusdisch unn videhl,  
 des is de Hoinze Doaniel.  
 Moi zwaa Begleiter treu und brav,  
 Andreas Mitsch unn Andreas Engraf.

Basst emol uff ehr Leid,  
 jetzt kimmt woas goanz wichtiges for heit.  
 Die finf wu uffem Fetsche Bruno soine Kutsch heit sitze,  
 oaner defu is goanz einsame Spitze.  
 60 Jahr hoter soi Pflicht unn Schulligkeit gedu,  
 es is en echte Hoambescher Bu.  
 1943 iss er in de Parrgemeinde uffgetaucht,  
 7 Parrer hot er inzwische schunn verbraucht.  
 Heit zaijlt er aa schun zu de alde,  
 es iss unsern Küster, de Ensingers Walter.  
 Der Herrgott gab ihm die Kraft,  
 das er des 60 Jahr ohne Unnerbrechung schafft.  
 Des is in de Mainzer Diozese einmalig unn lobenswert,  
 drum hot en de Kardinal Lehmann  
 mim Maddinsodden geehrt.  
 Net blous die parre häwwen gernkadde,  
 es is jo aa moin Grossvadde.

Die Musik kann jetzt oaner bloose,  
 unn ich duh jetzt des Glas oustoße.

### L i e d

Jetzt kennt er eisch druff vorbereide,  
 es kumme die neischde Neiischkeide.  
 Isch will garnix redde vumm Sozialoabbau,  
 dodemit wär isch souwiesou nett schlau.  
 Doch woas in Hoamboach kertzlich bassiert,  
 des häwwisch nett kappiert.

Vors Jahr hotts noch Stroof defor gäwwe,  
 woann mer oam Palmsunndoag drei  
 Weidekätzelschinn oabgemoacht häwwe.  
 Des wär Nahrung fä die Biene,  
 soache nett blous die Griene.  
 Sou waar domools des Gesetz,  
 unn ? wie isses`n jetzt.  
 Vumm Gottfried bis zu de Miss Veggelschboach, dreihunnert Meeder die Weide  
 radikaal umgemoacht.  
 Es sinn blous noch Stumbe iwwerisch geblewwe,  
 wie die Willsei häwwe ses do gedrewwe.  
 Es klingt heit wie enn Spott,  
 dass sisch des Gesetz um hunnertoachzisch

Groad gedreht hott.

Iss doann des jetzt alles vergesse,  
 brauche die Biene jetzt nix mäj zu fresse,  
 woann se noch vier Woche gewaat hehn,  
 doann hehn se gebleicht,  
 doann hehn die Biene noch wenigschdens des Johr woas zu fresse kriecht.  
 Isch glaab sou loangsoamm, dass isch spinn,  
 woas hott doan des foroan Sinn.  
 Veleischd wolle sou e paar Schlaue,  
 do aa noch en neie Boahnhouf hiebaue.  
 Des is zum groine nett zum lache,  
 unsern Hoambächer Boimoaschder Rudi deet  
 sou woas nett mache.  
 Der deet nett mitmache bei sou Bosse,  
 noch nett emol Kaschdanieebehm deet der ummache losse.

Genau sou en Straasch wie jedes Johr hott mer werrä, hinnerm Schulhaus des  
 Efeu oabgschnerre mit soamt de Blädder.  
 Mer guckt blous zu, es wädd nix geduh,  
 un denkt loss mer moi Ruh.  
 Des war de erschde Streisch, de zwadde folgt zugleich.

Die Musik macht jetzt oaner druff,  
 unn mer gebt emoal die Flasch eruff.

### L i e d

Woas alles sou bassiern kann, er liewe Leit,  
 des verzähl isch eisch emol heit.  
 Zwaar iwweifeische Feierwehrmänner,  
 häwwes garnett oabwaade kenne,  
 vor lauder schnell-schnell,  
 woar oaner blouss mimm T-shirt oan de Oisatzstell.

Der oanner is mim Slip,  
 en schwarze un es broune Schuh zum Oisatz hie,  
 isch glaab des woar de Satzi.

Wie sen gfrogt häwwe: a wie kimmschd doann du,  
 horrer gsod :

a dehom häwwisch noch emol sou e paar Schuh.  
 Die Owwerndörfler finnes unerheert,  
 sie fiehle sich in erner Noachtruh gschteert.  
 Jedes Mol wache die noachts uff,  
 woann die Feierwehr fährt in die OSO nuff,  
 unn falle vor Schreck, faschd aus erm Bett.  
 Unn schneller gäit des ohne Madderhorn  
 und Blaulischd nett,  
 wies ewwer oam Sendemaschd uff de Häi hott gebrennt,  
 sinnse glei nuffgerennt.  
 Sie sinn hie und hä gerennt,  
 ewwer näjenz hotts gebrennt.  
 Des war denne nett gaonz gehajer,  
 häwwe nett gemerkt, dass se schon es vädde Mol vorbeigerennt sinn oam Feier.  
 Ja die Feierwehr, die rennt woanns brennt,  
 uff die Häj, iwwer die Krick, unn werrer zurick.

Ich drink emool vum Hoambecher Woi,  
 unn ehr stimmt mit de Musik ins Lied oi.

## L i e d

E paar Jugendlische häwwe sich en Bauwache kaaft, häwwen mit veel Mieh in de  
 Wingert gschlaaft.  
 Fehl Äwwet und Geld noigeduh,  
 a noch en Kloh fä umme dezu.  
 Häwwe sich gfraacht iwwer die goanz Sach,  
 häwwe gedenkt, woann emol aoner en Haufe muss  
 oder e Bach.  
 Wiese doann kumme sinn in de Wingert naus,  
 der Droam vumm Wache soamt Kloh war aus.  
 Do hott doch oanner ohne gfroacht,  
 alles werrer weggebroacht.  
 Do häwwe se gsoad noch gaoanz gschockt,  
 oab heit wädd gaonz oafach werrer  
 zwische die Wingertszeil ghockt.

Geb mer mool des Fläschel Woi,  
 sunscht schloofe mer die Leit noch oi.

## L i e d

Em Mädche noch nett goanz dreisich,  
brav unn a reschd fleisich,  
hott mit em Oamer Wasser en Volle,  
im Stall des Rindvieh dränke wolle.

Des Hornveh nott nett druff reagiert,  
des hott se nett kappiert.  
Sie iss vunn oanerer Kuh zu de oanner geloffe,  
doch all häwwe se ums Verregge nett gsoffe.  
Sie hott ehne gut zugeredd, jetzt froch isch eisch,  
hätt er verleischd die Klaueseisch.  
Doann is se druffkumme, wie se scharff nochgedenkt,  
a geschdern hott de Vadder jo  
Selbstdränkautomade uffgehängt.  
Woar des e Glick,  
gebobbelt hot se blous noch, „Scheiss Technik“.

Enn Moann sieht en Buu mit em Fahrroad,  
un denkt woas soll des blous,  
des Fahrroad iss vor denn doch vehl sou grouss.  
Vor sou en kloane Borschd,  
doch mer is es Worschd.  
Wierer in soi Garasch kumme iss, ou Schreck,  
soi Fahrroad des war weg.  
In dem Moment do war ehm klar,  
dass des Fahrroad vunn dem Buu soi eigenes war.  
Er iss glei lous, hott den Dieb ewwer nett gfunne,  
der war spurlous verschwunne.  
Zwaa Doach speerer is er in Hepprum de Groawe oanne,  
unn do hott soi Fahrroad friedlich dogstoanne.

Hott gemault, es nitzt nix woann mer soi Fahrroad obsperrt,  
mer muss es oann Aasch binne, dass es nett geklaut wärrd.

Die Musik soll noch emool speele,  
ich muss mer mool die Gorgel eele.

### L i e d

Beim Parrfeschedt gibt's veel gure Sache,  
e Fraa wollt dodevor Saloat ousmache.  
Soamsdoach`s iss die Stefanie,  
zum Saloat oabhulle hie.  
Sie hott geklingelt, do iss däre Fraa  
ern Moann rausgerennt,  
noch goanz verschloofe,  
weil er groad gepennt.  
Korz defor horrer noch e Willsau gschosse,  
jetzt stäiht er do in de Unnerhoose.  
Des Mädche kriecht en Schreck,  
oamm Liebschde wär se werrer weg.  
Doch sie hott sisch e Herz gfasst  
unn hott sisch zoammegenomme,  
unn säischt isch binn zum Saloat oabhulle kumme.  
Der Moann inn soim scheene Schloofdress,  
säischd a woas soll doann dess.  
Er is groad aus em Schloof geresse woarn,  
darum horrer noch e bissel Zorn.

Er säjschd, isch waas vunn nix,  
un gäiht in de Gaade mim Messe,  
„da do hoschde woas zum Esse“  
Des Mädche is doann ins Parrhoim unn hott gsaod,  
da, jetzt hämmer de Saloat.

Isch binn glei feddisch mit moim dischde,  
schnell noch e paar Kortznoachrischde.

Oanner hott e Sechserpackung Bier umdausche gewott, die er schon länger wie e  
Johr kaafd kadde hott.  
Doch koanner hott dem Dolle,  
des Bier umdausche wolle.  
Er is geloffe vun Pontius bis Pilatus,  
doann is er druffkumme  
oam Schluss, weils ehm koanner oabgenomme,  
des mol war isch werrer de Dumme.

Schenkt mer werrer mol oi,  
doann uff souwas muß gedrunke soi.

### L i e d

Im Unnerndorf hott die Woihnachtsbeleischung  
nett gebrennt,  
do sinnse zum Chef vum Owwerndorf hiegerennt.

A die Beern duhn jo nett,  
woas er uns do gäwwe hädd.  
Do säischd doch der Oanner eiskoalt,  
woas wollt doann er, er häbt jo die Beern jo noch garnett bezoahlt.

Vunn Kerschhause woar ledscht Johr  
oanner uff de Kerb do,  
mit soim Vehiggel Alberto.  
Des Johr vor de Kerwemondoach,  
mach isch demm en Vorschloach.  
Bass uff, dass de moiye de rischdisch Wääg nimmschd, dass de ohne Hilf werrer  
hoamkimmschd.  
Dass de nett werrer in de Luft hängschd,  
mach sou koa Bosse,  
des Fliege soll mer de Veggel iwwerlosse.

Oans megd isch noch bekoannt gäwwe zum Schluss,  
weil des uubedingt a emol gsoad wern muss.  
All denne e herzlich Doange soache,  
die heit unn in de ledschde Doache,  
zum Gelinge vun unserer Kerb beidroache.  
Oans noch soach isch aa,  
woas wär die Kerb ohne Michi und Martina.  
Uff sou Leit sinn mer stolz,  
doann die sinn ausem rischdische Holz.  
Woann oam sou veel gudes wiederfährt,  
des iss schon en kräfdische Beifall wert.

(Jetzt kennt er klatsche!!)